

Nemlichin das eyne igliche frauwe nach ires elichin mannes tode eynen dritten teyl habin sal an allen sienem gute, wo er das hat vnd an welchin enden das gelegin ist, vnd auch was czwey schepphen wissentlichen ist vmbe gelt, das nymand douor gericht kan nach en mag, vnd wanne der man das wip genymmet, das danne alle ire gut die sy had des mannes sin solle, farende vnd vnfarende, wo sy das hat adder an welchin enden dy guter gelegin weren, nemlichin in der stat zcu Pirne wichbilde. Vnd eyne igliche frauwe sal haben von irer gerade wegin zcum ersten alle yre cleyder, das beste bedte mit czween lynlachen, zcwey kussen, eyn deckelachin vnd eyne decke, vnd was daruber von ingethumes were, das sal dy frauwe dy helffte nemen vnd den kindern dy andere helffte lassin. Ist aber das man vnd frauwe keyne kinder mitenander haben, so sal dy frauwe alle gerade behalden ane silbern gefesse vnd guldin; vnd was der man zcu sienem nutze hatte gewurcht lassin vnd geczuget, das sal folgen zcu dem erbe vnd nicht zcu der gerade, abir gebende, furspan, preczschin, vingerlin vnd desglich, domidte sich dy frauwen cziren, sal sy behalden. Stirbet aber dy frauwe ehir denne der man vnd lest vnberathene tochter, so sal der man den tochttern dy gerade zcu nutze keren so her beste kan adder mag, ist abir do keyne tochter, so sal der man der tothen frauwin nestin gespynnen gebin der tothen frauwen beste par cleider vnd eyn bedte nest dem bestin, das sie gelassin hat, czwey kussen vnd eyn par lienlachen vnd eyne decke; was danne gerethes vnd ingethumes ist, das sal der man behalden. In der selbien wiese sullen dy<sup>1)</sup> sone, ab sie wittewe by in<sup>2)</sup> irstirbet, geben dy gerade, ab sy keyne swester habin, ist abir do eyne tochter adder eyn pfafe der wittewen son, dy sollen die gerade halb nemen vnd dy andere helffte iren brudern lassin. Were ouch, ab eyn man sturbe, syn hergewethe sal nemen syn neste swertmage, der yn vnsir stat wichbilde ist. Vnd als sy sunderlichin mitenander abekomen sind, welche iungfrauwe addir mayt sich selbir an irer eldern willen verlobet, das sie danne ires veterlichen erbeteyles darben sollen vnd daran keynen teil haben, vnd wanne irer mitteburger eyner gesturbe vnd nach sienem tode kinder liesse, das danne sulch gut, das den kindern von dem vater anirstorben were, von eynem kinde uff dy andern gefyle bis uff das letste kind vnd danne von dem letsten kinde uff dy muter gefallen sulde,

das sy vns eyntrechtlichen vnd vlissiclichen gebethin haben, alle sulche stucke irer willekor vnd eyn iglichs bisundern von worte zcu worte vnd synne zcu synne gnediclichin zcubestetigen geruchten. Habin wir angesehin dy redelichkeit irer bethe, anneme dinste, dy sy vnsern eldern uffte getan habin, iczund vns thun vnd furbasher thun sollen vnd mogin vns vnd vnsern erben, vnd sunderlichen vmbe der gnanten vnser stat merglichen besserunge vnd zcunemunge willen vnd habin in darumme alle sulche stucke, wie dy obingeschrieben sind, in allen iren synnen artikelen vnd begriffungen gnediclichen zcugegeben, confirmiret vnd bestetiget, confirmiren vnd bestetigen in die also geinwertlichen in vnd mid crafft desses brieues, solcher artikel vnd innehaldunge irer willekor, wie dy in dessem brieue obingesaczt vnde gescrieben ist, der furbaßher meher ewiclichin zcugebruchen vnd die zcubehalden, wanne vnd wie uffte sich das gebored, von<sup>3)</sup> vns vnd den vnsern vngehindert ane arg vnd geuerde. Hirby

1) Cop. sy. 2) Cop. im. 3) Cop. vor.